

海東釋史卷第五十一

藝文志十

中國詩二紀事 題詠 詠物

〔隋煬帝〕紀遼東二首

遼東海北剪長鯨。風雲萬里清。方當銷鋒散馬牛。旋師宴鎬京。前歌後舞振軍威。飲至解戎衣。判不徒行萬里去。空道五原歸。

秉旄仗節定遼東。俘馘蠻夷風。清歌凱捷丸都水。歸宴雒陽宮。策功行賞不淹留。全軍藉智謀。詎似南宮複道上。先封雍齒侯。古詩紀

〔王胄〕紀遼東二首○詩所云奉和煬帝作也

遼東沮水事龔行。俯拾信神兵。欲知振旅旋歸樂。爲聽凱歌聲。十乘元戎纔到遼。扶濊已冰消。詎似百萬臨江水。按轡空回鑣。

天威電邁舉朝鮮。信次即言旋。還笑魏家司馬懿。迢迢用一年。鳴鑾詔蹕

發淆潼。合爵及疇庸。何必豐沛多相識。比屋降堯封。同上

〔王褒〕高句麗樂府

蕭蕭易水生波。燕趙佳人自多。傾盃覆盃濯濯。垂手奮袖婆娑。不惜黃金散盡。只畏白日蹉跎。同上

〔李白〕高句麗樂府

金花折風帽。白馬少遲回。翩翩舞廣袖。似鳥海東來。李白集

〔蘇軾〕次韻王晉卿奉詔押高麗燕射

北苑傳呼陞楯郎。東夷初識令君香。天山自可三箭取。海國何勞一葦航。宣勸不辭金盃側。醉歸爭看玉鞭長。錦囊詩艸勤收拾。莫遣鷄林得夜光。

東坡集

題高麗亭館本序云元豐七年有詔京東淮南築高麗亭館密海二州騷然有逃亡者明年軾過之歎其壯麗留一絕云

檐楹飛舞垣墻外。桑柘蕭條斤斧餘。盡賜昆邪作奴婢。不知償得此人無。

同上

〔樓鑰〕題高麗行看子本序云高麗賈人有以韓幹馬十二疋質於鄉人者題曰行看子聞其懷金來取因令工臨於寫而歸之再用東坡韻書臨本之後

竹批雙耳風入蹄。霜鬣剪作三花齊。相隨西去皆良種。撼首奮鬣迎風嘶。丹青不減陸與顧。麗人傳來譯語通。裝爲橫軸看且行。云是韓幹非虛聲。圉人乘馬如乘鶴。人馬相語同呼啄。中有二疋真游龍。爬梳迴立綠楊風。賈胡携金贖此馬。亟呼工人臨舊畫。我詩無由到三韓。寫向新圖時自看。
唐本

〔釋明本〕次韵瀋陽王題真際亭謹按瀋陽王即高麗王也

高亭結構標真際。體共雲林一樣閒。山勢倚天忘突兀。水聲投澗自潺湲。迦陀迴出言詞外。海印高懸宇宙間。佇看凭欄人獨醒。又添公案入禪關。
中峯廣錄

〔許國〕朝鮮 國王挽詞四首

憶昨軒弓墮。攀號萬國同。東藩頻涕淚。北望洒雲空。縞素道相屬。精誠天

與通。那知龍蹕遠。猶自挽髯從。入境初聞政。停車忽報哀。黃麾猶在野。紫詔爲誰開。雲暗扶桑色。天摧屏翰材。宸衷應悼切。歸贈特恩來。

二紀寧荒報。三年棘素衣。慈聞難再返。仙馭竟同歸。遺澤留冠佩。悲風入羽旂。所嗟將寵命。不及接容輝。

慰使音仍在。酬賓席已空。漢江餘夕照。邸殿起秋風。仙氣蓬山近。恩輝泉壤通。朝宗心未已。應逐海潮東。
許文集

朝鮮 世子權署國事贈言二首

署國遵 遺命。居廬總庶官。遙心傾北極。令德稱東藩。肅仗承明詔。含悽釋素冠。諒慈忠孝盡。傳譽滿長安。

九葉嗣爲王。瑤函錫命光。貽謀在忠順。保祚以遐昌。人望符先得。天心璧已當。顧言殫問學。輔弼任貞良。
同上

〔高啓〕朝鮮兒歌本序云予飲周檢校宅有二高麗兒歌舞者

朝鮮兒髮綠。初剪齊雙眉。芳筵夜出對歌舞。木綿裘軟銅鑲垂。輕身回旋細喉嚨。蕩月搖花醉中見。夷語何須問譯人。深情知訴離鄉怨。曲終拳足拜客前。烏啼井樹蠟燈然。共訝玄菟隔雲海。兒今到此是何緣。主人爲言曾遠使。萬里好風三日至。鹿走荒宮亂寇過。雞鳴廢館行人次。四月王城麥熟稀。兒行道路兩啼饑。黃金擲買傾裝得。白飯分餐趁舶歸。我憶東藩內臣日。納女椒房被褱翟。教坊此曲亦應傳。特奉宸游樂朝夕。中國年來亂未鋤。頓令貢使入朝無。儲皇尙說居靈武。丞相方謀卜許都。金水河邊幾株柳。依舊春風無恙否。小臣撫事憶升平。尊前淚瀉多於酒。列朝詩集

〔李應徵〕聞王師東援朝鮮

材官十萬欲平倭。司馬何如漢伏波。殺氣曉連玄菟郡。將軍夜渡白狼河。還須直破伊歧島。莫使虛傳仗杜歌。禮樂東藩箕子國。王師急爲洗干戈。

〔區大相〕紀朝鮮事萬曆戊戌九月

自有東事六七載。廟堂歲歲議封貢。近者群公幸主戰。折將隳軍竟何用。

海澗芻糧不易渡。五鍾一石勞傳送。橫征頗憲空杼柚。轉輸未免妨畊種。去年小挫由忌功。今年大岨緣輕縱。執事顏行屢見逆。天王威命何曾共。封旣無成戰失利。公私之積咸哀痛。更無一人能畫策。徒有諸僚成聚訟。要荒交侵古來有。更於中國何輕重。當時只合問曲直。按兵境上不爲動。朝廷制馭自有道。豈在勞民與動衆。奈何誤聽小人計。日以和好自愚弄。從此兵端尋歲月。豈知海內爲虛空。財傾左藏不足惜。民傷萬命能無慟。近聞有議留屯戍。老成億度或屢中。充國金城上方畧。李牧雁門費邊供。來年喪敗咎北軍。弓馬雖閑備騎從。兵越少年習水戰。檣楫輕利過飛鞚。倘能諫練三萬人。坐見校蕃受羈控。腐儒何敢與肉食。聊以短章代微風。繞朝勿謂秦無策。中興尙看甫作頌。明詩綜

定朝鮮

皇赫怒命東征。千翼舉七萃行。渡綠江援。王京。驚足斷海波平。扶桑拂暘谷升。旭日中仰大明。一戮羣倭定朝鮮。武功振文德宣。囊弓矢戢戈鋌。

藩服固王會全祥瑞降諸福駢祝聖壽萬斯年。二解。同上。

〔洪瞻祖〕題李都督朝鮮圖

王者安天下終資不戰功。金城圖畧上。青海戍樓空。長笛關山月。寒砧木葉風。還將憂國淚。添入錦題中。

〔袁懋謙〕東封日本歌靜志居詩話曰此嘲石尙書作也

司馬頻年苦運籌。東封擬解廟堂憂。如今却似商人婦。愁水愁風望去舟。明詩綜

〔王士祿〕詔罷高麗貢鷹歌

真人御極臨八荒。百蠻九驛皆享王。西旅之獒越裳雉。貢物各各因其方。海東俊鳥好毛質。鐵爪金眸猛無匹。九都作貢來天家。特受鞴鍔佐罽毼。晾鷹臺上秋天高。刈蘭驅獸行蒐苗。羽騎驂驛翠華至。星旂雲罕紛週遭。蒙鵝射熊未足羨。跋犀瘞兕勞遮邀。是時摘條試一縱。萬人昂首瞻青霄。飛鳥狡兔失巢窟。委身洒血填君庖。至尊往往動顏色。玉虬迴轡鳴蕭蕭。

柔遠猶然勤睿旨。詔罷奇謀自今始。行葦兼存踐履悲。茁葭漫賦春田美。聖神舉動殊尋常。此事悠悠古誰比。君不見虬髯天子英雄人。佳鷁猶遣懷中死。感舊集

〔尤侗〕朝鮮竹枝詞四首

高句麗降下句麗。未若朝鮮古號宜。千里王京陳百戲。漢城猶見漢官儀。男珍注曰古朝鮮并入高句麗隋征之不服貶為下句麗洪武中入貢奉詔更號朝鮮以漢城為王京每詔使至雜陳百戲

長衫廣袖折風巾。硬紙狼毫漢字真。自序世家傳國遠。尙書篇內九疇人。白睡紙狼尾筆書與中國同文

楊花渡口杏花紅。八道歌謠東國風。最憶飛瓊女道士。上樑曾到廣漢宮。

國有八道楊花渡在漢江濱閨秀許景樊後為女道士作廣漢宮玉樓上樑文

小兒八歲號黃昌。舞劍能誅百濟王。更唱嘉俳會蘇曲。朝來蠶績已盈筐。梅庵集○黃昌及嘉俳注併見樂志

右記事

〔唐太宗〕遼城望月

玄菟月初明。澄耀照遼竭。映雲光暫隱。隔樹花如綴。魄滿桂枝圓。輪虧鏡彩缺。臨城却影散。帶暈重圍結。駐蹕俯九都。佇觀妖氛滅。全唐詩

〔吳激〕鷄林書事

箕子朝鮮僻。蓬丘羽水寬。儒風通百粵。舊史記三韓。邑聚巢居慣。夷裝被髮安。猶存古籋豆。兼用漢衣冠。兔穎家工縛。鮭腥俗嗜餐。騎兵腰玉俱。府衛挾金丸。長袖鳶窺肉。都塲狄掛竿。棗中蔡氏弄。指下祝家彈。主禮分庭抗。賓筵百拜難。漬橙杭釀旨。滋桂鹿脩乾。澄墨松如櫛。墮墻石似丹。地偏先日出。天迫衆山攢。鵬翼雲帆遠。羊腸石磴盤。由來異文軌。休訝變暄寒。事可資談柄。誰能記筆端。聊將詩貌取。歸作畫圖看。

〔張翰〕奉使高麗過平州館

昨日龍泉已自奇。一峯寒翠壓簷低。兼并未似平州館。屋上層巒屋下溪。上同

金郊驛

山館蕭然爾許清。二更枕簟覺秋生。西窓大好吟詩處。聽了松聲又雨聲。上同

〔蔡松年〕高麗館中二首

蛤蜊風味解朝腥。松頂雲痴雨不晴。悄悄重簷斷人語。碧壺春筍更同傾。
晚風高樹一襟清。人與縹甃相炤明。謝安微吟有深致。海山星月摠關情。上同

〔李晏〕高麗平州中和館後草亭

藤花滿地香仍在。松影拂雲寒不收。山鳥似嫌遊客到。一聲啼罷小亭幽。上同

〔張寧〕渡大同江

平壤孤城發曉裝。畫船簫鼓麗陽春。烏邊雲盡青山出。渡口潮通碧海長。共喜皇仁同大地。不知身世是他鄉。清樽且莫頻相勸。四牡東風路渺茫。

錄奉使

登黃州廣遠樓

層樓高出翠微間。景物迢遙慰客顏。芳草夕陽天外路。亂峰殘雪海中山。烟凝野色村居小。風送邊聲獵騎還。却憶帝鄉春似海。蓬萊宮闕五雲閑。

登鳳山樓留題

鳳山樓館鬱岩嶢。千里經行漢使輶。人語殊方應漸解。詩懷多病欲全消。望窮曉影雲連雁。聽斷寒聲海落潮。不用咨詢重吊古。四鄰無事息征徭。

午發劔水道中望龍泉

層巒高處露亭臺。騎從如雲暮景催。繞徑藤蘿芳樹合。滿山荆棘野花開。林間春色鶯啼盡。天際晴光鳥帶回。何事碧霄凝望久。長安不見獨徘徊。

登金郊驛樓

搖搖旌旆遠躋攀。坐算遊程兩月間。芳草無情隨處綠。好山如畫對人閒。一年風物春將老。千里星槎客未還。昨夜分明歸夢國。依然清禁立鷓班。

渡臨津

三月韶華景最新。棹歌聲裡渡臨津。雪消野渚多青草。雨過芳洲長綠蘋。畫舫清遊天上客。碧雲疎影水中人。桃花浪暖魚龍起。楊柳風和鳥雀頻。歸思欲迷南浦樹。江流不到故園春。九重霄漢雙飛羽。千里星河一縱鱗。莫笑沿流同汎濫。也應隨處詢咨謾。茲行總為宣恩命。非是乘槎漢使臣。

三月三日寓太平館

曲水流觴盡醉歸。風光雖是故鄉非。桃花小雨迷行館。細草春香上客衣。誰捲疎簾望新月。自吹長笛倚斜暉。此情不為傷離別。王事驅馳惜重違。

上同

登太平樓館六十韻本序云天順四年春予奉命使朝鮮登高望

川幽顯雖殊心目俱至其間帝流覽王國時人事景物山
之外者雖余亦既知之然與廢成章政自不能不爾也棄華用實
焉文獻之地宜有同余心者

飛樓縹渺入蒼穹。西望長安意已通。天地有恩同覆載。華夷無處不朝宗。
遼陽東下三千里。華嶽西連百二重。金闕玉關嚴虎豹。白旄黃鉞定羆熊。
漠南道遠烽烟絕。薊北諸屯保障雄。寰宇總膺周典則。輿圖盡屬漢提封。
九成韶樂儀群鳳。五色祥雲駕六龍。上苑韶華寬似海。貴遊羅綺爛如虹。
編摩自古元無地。繼立生民有未功。萬國梯航馳玉帛。千家門第動詞鍾。
化行九服垣墉外。人在三王禮樂中。億載不移高帝業。兩京齊出至神工。
荒言却笑莊蒙叟。欲賦應須左太冲。身使殊方思莫及。心懸天府睇難窮。
由來東土文風好。自昔中朝錫予隆。藩屏皇家崇節度。儀刑聖範恤疲癯。
內承畿甸民嘉靖。外控邊荒地激衝。八道分符循俗美。重門擊柝備時凶。

路窮水陸鄉音別。春滿乾坤景色同。鷄犬人家延四野。烟霞山廓亘千峰。
流年又逐陽和換。微物均爲造化容。原隰條桑初展綠。池亭佳杏已迎紅。
空林三潤人蓼長。遠島沙平竹蛤豐。芳草欲迷歸客思。倉苔不鎖舊遊踪。
溪留殘白春前雪。柳折新黃夜半風。竹外涼陰晴鎖碎。梅邊香藹曉朦朧。
園明桃李蜂蒸蜜。野曠葦蒿鹿養苴。花落花開如剪綺。人來人去類飛蓬。
興來倚檻吹長笛。坐久巡簷策短筇。高絕欲窺徐市國。清虛渾憇武夷宮。
扶桑折木疑相近。方丈瀛洲倍易送。擬跨龍驤迢汗漫。還期鶴算等崆峒。
圍香簾幙流蘇繞。還翠欄干錦縠叢。入座有情看燕舞。過窓無語訝鶯慵。
光生殿閣留宸翰。喜溢街衢結綵絨。何處邨田聞社鼓。幾家庭院啓雕櫳。
清泉門巷幽居雅。白石巖扉古刹崇。似有忽無嵐氣入。輕寒乍暖日華融。
層冰絕壑長宜夏。高嶺孤松久耐冬。游獵只應多雉兔。樵蘇元不禁兒童。
川原繚繞遐堪矚。人物奇饒秀所鍾。革履長衫供役婦。卉衣陡笠沒官傭。
府中伐琴趨羣吏。苑外鳴笳練小戎。鄉媪入城輸土布。地爐燒火鑄山銅。

越裳重譯關津便。魯國多賢士類充。天際樓船來海賈。雨餘阡陌勸耕農。
 海門潮落騰天馬。沙磧塵晴見斷鴻。馬邑崗陵知遠近。鳳山榛莽共溟濛。
 臨屯舊接真番界。平壤連遙沮水東。箕子荒祠碑率律。高麗殘戍石巃嵒。
 古今不盡登臨恨。形勝都歸磊砢胸。問俗欲尋吳季子。不才深愧宰周公。
 卯金縱閱登天祿。白玉藏書滿射洪。論事自慚楊子乞。通時翻慕仲車聾。
 沈淪每笑溝中木。宣暢誰彈爨下桐。勝覽直須探蘊結。高攀未許扣穹窿。
 境當妙處巧相會。情到盡時偏是濃。涼露寫詩銀管濕。夕陽催酒玉瓶空。
 吟成轉覺孤懷爽。醉後仍嫌兩鬢鬆。莫恠憑軒重眺遠。喜因風物荷時雍。
 上同

登漢江樓十首

天順四年春三月五日登漢江樓時申權二議政金朴二判書李府判尹李二承旨座皆朝鮮名士也酒酣落筆偶成十章不妨以覆醬瓿云

東國有高樓。樓前漢水流。光搖青雀舫。影落白鷗洲。望遠天疑盡。凌虛地欲浮。八窓風日好。下榻重淹留。

春水鴨頭綠。曉山螺髻青。斷雲依遠岫。孤鴈沒長汀。異域傷靡盬。明時笑獨醒。何忍忽來此。詩思入蒼冥。
 路遠輪蹄少。春深景物多。烟開山似畫。風淡水如羅。樂事酬佳節。清尊發浩歌。由來文物地。隨處好經過。
 杳渺飛流急。迢遙石磴平。山禽啼更歇。江浦暗還晴。興與雲俱往。情隨草共生。雙親未能見。聊復念神京。
 勝覽渾相似。佳期不用招。行疑鄉邑近。坐覺客懷消。谷鳥聲交應。溪花影對搖。春風如有意。吹送木蘭橈。
 洲渚望不盡。峰巒知幾層。病思金匱藥。渴飲玉壺冰。瑤海航堪渡。丹丘羽可仍。倚欄凝睇久。鄉思忽無憑。
 亦有白雲起。只無黃鶴來。地深同閨苑。境勝憶蓬萊。趣比元龍逸。詩慚太白才。共拚金谷罰。莫笑玉山頽。
 時序有代謝。江山無古今。衣冠幾遊覽。詩酒復登臨。對景懷遺事。觀風愜

素心。太平聲教遠。隨處有知音。
 四牡息駢駢。超然坐翠微。酒香滄舞袂。春風入羅衣。石徑松花老。疎簾燕子飛。座中皆勝集。向夕未言歸。
 徙倚窮佳致。盤桓極勝游。賢王好賓客。諸相總風流。已醉仍須飲。將還更欲留。明朝太平館。回首更悠悠。同上

登漢江樓又成

春日登高霽景開。漢江春水碧於苔。烟雲萬里鷗波濶。花柳千峯鳥道回。
 天上星槎何處達。城中冠蓋幾人來。客邊剩有題詩興。不用蕭蕭暮雨催。
同上

題韓判書鴨鷗亭詩卷

水雲深處草亭幽。有客忘機對白鷗。自許功名同散逸。莫將心事學沉浮。
 綸巾羽扇閑堪語。細雨斜風晚更留。好是曲江樓隱地。相呼相近幾回秋。
同上

浮碧樓

本序云三月十五日使還平壤燕浮碧樓因即命名之意效溫李體為短詞一章以記興云耳

洪流綠淨春無底。地核籠葱嵌春水。輪囷蜃氣凝不散。十二雕櫳晃如洗。
 空明倒浸蔚藍天。煥香半落麝蕪著。綠雲淺淡翠烟沉。人在琉璃鏡光裡。
 青城仙客還從東。袖携紫玉登蒼虹。左招浮丘右關尹。酒酣擊鼓馮夷宮。
 馮夷醉臥呼弗醒。滿屋鮫衣珠蚌冷。明朝回望舊遊人。一片江山夢中景。
同上

和陳先生登萬景樓

二首○本序云押韻為和非古也自明良賡詞以及唐人皆無此制所和者最懶於此蓋不能如前人之巧妙故也茲登萬景樓見內翰陳先生之作因步其聲韻為二律所謂未能免俗聊復爾耳觀者將惠我一笑也

江上危樓離俗氛。春初經過未相聞。風雲邱壑高低見。草樹人家遠近分。
 午灶茶烟蒼冉冉。芳塘桃漲綠沄沄。咨詢已遍歸期促。一倚雕闌日又曛。
 九霄西去是皇畿。萬景樓中暫解衣。天遠江流何處盡。春初詩興近來微。
 歌聲隔浦眠鷗起。松影迎風舞鶴歸。時物未闌清賞倦。不禁回首白雲飛。

上同

〔許國〕登太平樓二首

漢江城上太平樓。使節東來幾度留。窮海盡聞歌帝力。殊方那復動鄉愁。
捲簾秋色千山入。伏檻烟光萬井浮。獨有中宵懷魏闕。遙隨北斗望神州。
搖落偏驚海國秋。西風吹雨一登樓。坐中歌舞停高會。檻外溪山負勝遊。
異地堪裁王粲賦。將歸真抱宋生愁。他年尙憶投車處。池上盆花伴客幽。

許文
穆集

迴瀾石本序云吾助川上有石如屏橫障
川東古未有名余標之曰迴瀾石

平州蜿蜒遙山裡。岸轉沙窮翠屏起。迴作澗潭玉鏡開。一片芙蓉插秋水。
芙蓉秋水照晴空。雲錦參差畫圖中。壁立千尋勢不倚。衝波逆障何其雄。
世間之水總流東。誰當橫潰皆天工。君看萬古黃河上。岸石孤懸砥柱峰。

上同

葱秀山

茲山東葱秀。秋色共蒼蒼。峯巒有古意。草木皆天香。泉鳴珠珮落。石疊錦
屏張。信無美留戀。行行望帝鄉。上同

玉溜泉本序云山下小竇懸泉如雨冬夏
不竭琤琤玉鳴余命之曰玉溜泉

水石淨涓涓。殊方有洞天。山開一竇小。泉散亂珠懸。味出雲根冷。光含露
葢鮮。泠泠飄素玉。灑灑韻朱絃。膏澤翳荒谷。朝宗委大川。奈茲阻窮僻。何
以效微涓。漱潤窺丹罅。尋源倚翠巔。竹瓢分乳液。松鼎起茶烟。馬上餘幽
響。瑤琴爲爾傳。上同

太虛樓

飛棟迴欄切紫虛。遙天四顧獨躊躇。塵埃迥絕涵空碧。日月低懸在綺疎。
三島東浮仙子窟。五雲西隱帝王居。平生未解窺寥廓。此日憑高一啓予。
上同

巾車同魏諫議。出平壤城東北。并江行登浮碧樓。雨憇永明寺。晚霽。
觀麒麟窟。遂汎舟南下還大同館作。

我行海國誰與娛。賞心賴有山水俱。平壤山水更奇絕。樓臺縹渺江天虛。
 探奇吊古興不盡。巾車復出城之隅。石壁如削江如紆。中縈一道凌嶽嶇。
 江流忽轉石磴高。青雲白雲懸兩橋。平臺迥絕臨江臯。浮碧之樓孤岩嶢。
 岩嶢廻合抱崖石。江島前橫破江碧。鰲背微茫露一洲。又如彩虹半落江
 烟秋。北崖小閣更隈隩。沈沈下瞰江水綠。微風龍鱗波蹙玉。岸草汀花媚
 幽獨。江連山氣何杳冥。回看西倚之翠屏。牧丹片片照江色。到插琉璃錦
 障明。峰南斜帶永明寺。錦障橫天落金地。門端尙懸高麗詩。當時已解中
 華字。雲山忽起山雨至。咫尺烟霞有靈閔。晚晴著屐還登山。千峰萬峯空
 翠寒。麒麟已去窟空在。古石仄疊苔痕斑。聞說東明昔仙去。獨控麒麟出
 烟霧。朝天石上留蹄涔。水沒江潭不知處。嗟嗟此事竟荒唐。八駿不聞周
 穆王。枕中鴻寶徒自秘。小山無補淮南亡。有酒且傾勿復道。江秋極目傷
 秋草。與君鳴笳放舸下中流。青天不動波如掃。卻顧向來浮碧樓。蒼蒼暮
 靄沉江島。同上

登風月樓度凌波橋憩愛蓮堂觀荷有作

南國芙蕖花。昔賢聊寄意。芬芳播海隅。臺沼足佳致。層樓瞰清冷。孤榭隱
 荷芰。水上臥長虹。空中舉香袂。凌波弄素影。俯檻散幽思。殘萼已飄紅。踈
 莖猶疊翠。杯搖暮霞色。衣染秋霜氣。澹爾言與忘。悠悠心自媚。盈盈隔笑
 語。采采憶交契。落日更登樓。風月見光霽。同上

觀箕子井田有感

蘆門原濕尙縱橫。萬古誰知疆理功。川滄只今成道路。空餘禾黍動秋風。
同上

練光亭晚眺

薄暮驅車江上來。練光亭俯大江開。長波萬古寫空碧。天落銀河抱檻迴。
 平沙浩浩帶烟樹。遠翠微茫見江嶼。江頭亂石舞鯨鯢。橫波欲渡江潭去。
 蠹如鰲背負蓬山。側疊江城裊碧灣。睥睨百尺掛江樹。樓臺倒影冲融間。
 輕舟片片疑落葉。散亂江風點飛雪。何異槎浮牛女津。還同棹下山陰月。

落日浮雲江山秋。平壤往事隨東流。城南惟有井田在。古壇零落空山邱。俯仰乾坤一揮手。日子何甥今在不。魚龍博水不成橋。禾黍遺宮堪酌酒。我歌白雲繞坐飛。醉拂城闔作釣磯。投竿忽動滄洲興。控鶴終期海嶠歸。

快哉亭

危榭俯城隈。登臨亦快哉。山光低卷幔。江色近啣杯。雲樹千家市。烟霄百尺臺。更憐迎望處。荷芰水亭開。同上

望月亭

幽亭宜待月。宴坐但迎風。江雨暮偏急。林霜秋未空。亂帆烟樹裡。疊嶂水雲中。安得開晴望。清樽永夜同。同上

齊山亭

山亭倚空曠。四顧與山齊。樹色交簷密。雲光入戶低。長天飛鳥外。歸路夕陽西。目極增惆悵。蕭蕭征馬嘶。同上

和魏給諫發簇林溪韻

本序云魏諱時亮兵科左給事中同行副使

迴車臨斷岸。聯筏度清溪。草際露華白。沙邊曙色迷。海明看日近。野廣覺天低。始識乘桴意。如何畫九夷。同上

和沙里院道中韻

使履雖殊域。皇封自一家。有天皆雨露。何地不桑麻。風俗淳猶古。衣冠雅素華。恩波况漸及。滄海浩無涯。同上

望蟠松

車輦館前古松樹。萬枝低拂蒼烟開。露葉垂階接征蓋。風花灑戶邀吟杯。短牆不掩四時色。靈根獨抱千峰迴。停車爲爾一凝望。道傍偃蹇憐瓌材。同上

使旋遂至松下復次前韻

昔予遙望意自古。今予坐蔭心爲開。何年半摧霹靂斧。旋車一引葡萄杯。疎枝錯落翠蓋仄。老幹詰屈蒼虬迴。抱奇竟爾甘棄置。嗟嗟負此明堂材。

上同

阻雨同魏諫議坐快哉亭作

朝來大同館。阻雨不得發。卻上快哉亭。與君坐超忽。對榻寂無言。冥心入
寥廓。窅然合元化。萬慮此俱歇。是時雨初霽。山雲尙蓬勃。須臾漸披卷。秀
色明可掇。萬家烟樹開。數點江帆沒。溪山入襟帶。蒼翠上眉髮。清風吹我
襟。爽氣切人骨。始知四極外。不異在軒闥。自古共霄壤。何處分胡越。達人
悟鵬池。小夫營兔窟。身世等雲浮。心精同日揭。而我獨何爲。甘與物俱汨。
知君有道氣。神歛中不滑。遠役幸追陪。迷川濟慈筏。呼酒還共傾。浩歌待
明月。上同

〔魏時亮〕平壤拜箕子墓并訪井田遺跡

禹範留西土。先生獨向東。道無浮海歎。義與采薇同。舊井存殷畫。昇冠尙
古風。荒邱平壤外。麥秀想遺宮。明詩

〔姜曰廣〕朝鮮玉溜泉

蒼崖開洞壑。奔溜戛琳球。濺作晴空雨。清生暑月秋。含風聲更靜。咽石滴
還留。羨爾涓涓意。終歸大海流。明詩

渡大同江和董內翰

涓水元歸海。山城半入江。春湖翻石壁。飛雨打船牕。作賦才誰健。凌雲氣
未看。濟川輸董相。不日看經邦。明詩

登浮碧樓

山閣凌空起。孤雲挾雨飛。好花臨驛路。小艇占漁磯。石磴斜通郭。烟村半
掩扉。主人留客意。薄暮肯言歸。上同

過箕子古城有感

柳暗荒城水滿渠。幾家門巷帶村墟。井田已廢千年後。故壘曾經百戰餘。
果下更無三尺馬。盤中時有八梢魚。遺封舊墓知何在。試一停車問象胥。
上同

〔吳兆騫〕高麗營唐太宗東征舊蹟

文皇昔日征遼海。此地高麗亦駐兵。想像六軍頻血戰。蒼茫異代尙殘營。
黃雲積斷行人少。白骨原空蔓草平。日暮江流風雨外。滔滔東去不勝情。
秋筵集

右題詠

〔寶鞏〕新羅進白鷹

御馬新騎禁苑秋。白鷹來自海東頭。漢皇無事須遊獵。雪亂爭飛錦臂鞵。

〔梵琦〕高麗海東青行

海東青。高麗獻之天子庭。萬人却立不敢睨。玉爪金眸鐵作翎。心在寒空
講在手。一生自獵知無偶。孤飛直出大鵬前。猛志豈落駕鵝後。是日霜氣
何栗冽。長楊樹羽看騰瞥。奔雲突霧入紫霄。狡兔妖臺洒丹血。束身歸來
如木鷄。衆鶻欲并功難齊。爾輩無才空碌碌。不應但費官厨肉。
列朝詩集

〔黃石翁〕送高麗五明馬

海波不動關梁通。虬髯使者來吳中。名雕額間掛明月。四蹄猶帶龍堆雪。

仰秣不受田家藟。太官之羊五味俱。賢才萬里不難致。糠粃不充吁老矣。
元詩選

〔唐之淳〕詠高麗石燈

竅石觸幽遐。虛明詎異紗。琢從箕子國。藝向笠王家。耿耿知懸燼。亭亭訝
作花。定餘神自炤。經殘漏欲賒。願持明慧境。揚彩遍河沙。

〔黃庭堅〕次韻錢穆父贈高麗松扇

銀鈎玉唾明蠶紙。松箒輕涼并送似。可憐遠渡憤溝婁。適堪今時褊襜子。
丈人玉立氣高寒。三韓持節見神山。合得安期不死藥。使我蟬蛻塵埃間。
山谷集

戲和文潛謝穆父高麗松扇

猩毛束筆魚網低。松柎織扇清相似。動搖懷袖風雨來。相見僧前落松子。
張侯哦詩松韻寒。六月火雲蒸肉山。持贈小君聊一笑。不須謝雉穀黃門。
同上

謝鄭閔中惠高麗畫扇二首

會稽內史三韓扇。分送黃門畫省中。海外人烟來眼界。全勝博物注魚蟲。
蘋汀游女能騎馬。傳道蛾眉畫不如。寶扇真成集陳隼。史臣今得殺青書。
上同

〔蘇軾〕和張耒高麗松扇

可憐堂上十八公。老死不入明光宮。萬牛不來難自獻。裁作團團手中扇。
屈身蒙垢君一洗。掛名君家詩集裡。猶勝漢宮悲婕妤。網蟲不見乘鸞子。
集東坡

〔黃庭堅〕詠鷺青紙與高麗使二首

學似貧家老破除。古今迷忘失三餘。極知鵠白非新得。漫染鷺青襲舊書。
深如女髮蘭膏罷。明似山光夜月餘。爲辰溪藤三百箇。待渠湔拂一床書。
集山谷

〔袁凱〕題王叔明畫雲山圖歌

有客來自高句驪。遺我一幅丈二紙。纖白只如松頂雪。光明不減吳江水。
藏之篋笥今七年。妻孥珍重如紈綺。至正乙巳三月初。王郎遠來訪老夫。
升堂飲茶禮未畢。索紙爲畫雲山圖。

〔宋瑩〕題董文敏江山秋霽圖

秋霽長不滿三尺。高麗表紙光如銀。朱印燦燦色奪目。原注朝鮮國王印點綴更
足重瓊璫。西坡類稿

〔邵子湘〕題秋霽圖奉和漫堂先生詩

高麗鏡面只三尺。漠漠平遠開無垠。誰與愛者高詹事。大內鑒賞稱絕倫。
集青門

〔黃庭堅〕和答錢穆父詠高麗猩猩毛筆

愛酒醉魂在。能言機事疎。平生幾兩屐。身後五車書。物色看王會。勳勞在
石渠。拔毛能濟世。端爲謝楊朱。山谷集

戲詠高麗猩猩毛筆二首

枕椰葉暗檳榔紅。朋友相呼墮酒中。政以多智巧言語。失身作來管城公。
明窓脫帽見蒙茸。醉看青鞋在眼中。束縛歸來儻無辱。逢時猶作黑頭公。上

〔韓駒〕謝錢珣仲惠高麗墨

王卿贈我三韓紙。自若截肪光照几。錢侯繼贈朝鮮墨。黑如點漆光浮水。
舊傳績溪多老松。奚超既死松亦空。易水良工近名世。珍財始不歸潘翁。
蕭然南唐一居士。赤管隄塵無月賜。借問玄圭何自來。去年海中持節使。
明窓晏坐不忽忽。引紙磨墨寒生風。自笑平生縮蛇蚓。更慙爾雅注魚蟲。
殷勤二物從來遠。裨海環瀛眼中見。若欲寫揮藏名山。不如却作談天衍。
宋詩鈔

〔朱彝尊〕高麗蓂歌賦謝納蘭院長

若稽古帝伊耆。穿九井御六螭。百穀既播雨露滋。烝民乃粒無阻飢。維帝
念人壽之不永。稽首再拜就泰壹。小子而問之。小子前致辭。養生固有道。
曷不施赭鞭鞭百草。嘗其平毒審其寒燠。別君臣異涇燥。或冬而萌或夏

而槁。豐者芣蔓者抱。鼎用飪白用擣。咬咀三百六十五味。著爲本草經。授
諸醫師俾讎討。山娟娟兮水濛濛。爰有紫衣童子歌宵中。瑤光之宿帝車
尾散爲仙卉。三極五葉各一叢。人銜鬼蓋海腴名不同。是爲土地精。肩股
各具體。有時黃口兒。土中啼不已。高高羊頭岡。深深虎穴底。立苗團紫雲。
結子墮紅米。晉上黨趙邯鄲。遠而新羅百濟根結蟠。我昔於高麗圖經曾
覽觀。胥餘啓宇後。朝鮮世世稱外藩。森羅三千七百島。四至八到提封寬。
域中生稜類羊角。其上椶樹清陰攢。春州產尤嘉。堅白山垢癢。聞諸遼陽
土木槽地。先以熱湯野爐煮。何異都蔗去汁方登盤。此邦之人日炙風戾
乾。元氣不損形神完。珍藥豈易得。恒愁致者難。納蘭學士相於久憶別。重
逢歲在酉。三面山臨一面江。誦君清詩不去口。今春鳳艦復時巡。扈從依
然八十一車後。朝來帳殿喜合竝。憫我形枯貌黧醜。分我神草凡百莖。投
之几案鏗有聲。五加一把安足道。愛玩不異懷中瓊。服之洗憂恚。定心氣
益神智還髓精。失笑頗類西城之駱駝。口不能嚼左右齏。老眼秤星渾不

辨。刀圭約畧付銚鑷。作詩報學士奇觚。急就有媿。盧同馬異劉义何。瀑書亭集

〔徐乾學〕詠朝鮮牡丹

金谷朱萼二月天。裁成名種自朝鮮。愛看晴日低花圃。蚤向春風媚舞筵。紅。千年馳越尉。葡萄萬里使張騫。驪江絕域無人到。猶擬繁華天寶年。百寶欄前好試妝。主人愛償爲停觴。花開想像經蓬島。葉底分明是洛陽。新樣舞衣宜窄袖。故宮樂譜按霓裳。姚黃魏紫今無數。却借鮫人海外裝。儋園集

〔宋鞏〕詠朝鮮牡丹

花葉羅羅旁檻披。也從穀雨鬪芳姿。沈香亭暖柯全改。鴨綠江空種乍移。苞奪臙肢明霽日。穗分瓔珞颺微颺。殷勤一剪濃春色。會遣朝雲識此奇。西陂類稿

右詠物

附句

〔梁元帝詩〕黃龍戍北花如錦。玄菟城前月似蛾。古詩紀

〔陳後主詩〕直去黃龍外。斜趨玄菟端。同上

〔李百藥詩〕雪夜清玄菟。騰笳振白狼。全唐詩

〔沈佺期詩〕白狼河北音書斷。玄菟城南秋夜長。同上

〔岑參詩〕白狼河北堪愁恨。玄菟城南皆斷腸。同上

〔杜甫詩〕合昏玄菟郡。中夜白狼圍。同上

〔楊巨源詩〕城遠迷玄菟。川明辨白狼。同上

〔李義山詩〕可惜前朝玄菟郡。積骸成莽陣雲深。同上

〔蘇軾詩〕乞與三韓使。新圖到樂浪。東坡集

〔張惟機詩〕羽檄遠指玄菟郡。天戈直揮白狼山。白狼玄菟紛雷轟。殺氣夜寒刀斗肅。

〔楊維禎與客登望海樓詩〕遠人新到三韓國。中土文明聚五星。

〔王士禎呈山長從兄詩〕據地狂歌久陸沈。聲名萬里過鷄林。漁洋集

〔顧炎武詩〕紫塞連玄菟。黃華界白羊。亭林集

附日本詩贈和本國人

〔木實聞〕寄別青泉申公木實聞字達夫號蘭亭又稱玉堂真人日本

耕牧以醫官從焉

文旆茲初返。壯遊賦幾篇。重逢揮彩筆。再別絕朱絃。層海珣玕秀。三山鸞鶴羣。鄉園歸到日。美譽炤凌烟。客館筆談

寄別耕牧姜公

富山壁立宿雲收。積雪玲瓏照綺裘。傳命即今辭紫闕。回轅更欲向青邱。地開金谷齊連榻。月滿蓬萊共倚樓。爛醉促軫撫商調。七絃遍動別離愁。

上同

寄別西樵白公二首

鷄林仙客入扶桑。行李每攜採藥囊。客舍漏長風雪夜。飄然吹律動春陽。燈下金盤橘柚鮮。洞庭秋色滿賓筵。明朝更作河梁別。遙望西山落月邊。

上同

〔朝文淵〕奉呈青泉申公文淵字德涵號玄洲日本吳下人

使星遙指武昌城。颯爾雄風萬里生。繫馬高樓清景地。翩翩彩筆耀東瀛。

遺蓬珠島

呈姜張兩詩伯按姜即姜栢也張即張應斗也申青泉之使日本張亦從行

天才銜命入扶桑。征路秋深橙橘黃。賦就彩虹橫碧海。潛鱗躍出逐餘光。

上同

〔山縣孝孺〕朝鮮二丈席上。出示梅瓶需詩。押以梅開孟字

赤水橋頭一樹梅。却從瓶裡趁春開。分明認得東君意。要照嘉賓夜宴盃。

日本名家詩選

海東釋史卷第五十一終

本會役員

名譽賛成員

舊韓國統監子爵 故

曾 禰 荒 助

朝鮮駐劄軍司令官陸軍大將男爵

大 久 保 春 野

東洋拓殖會社總裁男爵

宇 佐 川 一 正

朝鮮中樞院副議長從一品勲一等

金 允 植

舊韓國內部大臣

朴 齊 純

舊韓國農商工部大臣

趙 重 應

特別賛成員

朝鮮總督府取調局長官

石 塚 英 藏

舊韓國內部次官統監府參與官

岡 喜 七 郎

舊韓國警視總監

若 林 賚 藏

朝鮮總督府土地調查局副總裁

俵 孫 一

司法部長官

倉 富 勇 三 郎

舊韓國內部警務局長統監府參與官

松 井 茂

舊韓國宮內府次官統監府參與官

小 宮 三 保 松

總督府度支部長官

荒 井 賢 太 郎

總督府農商工部長官

木 內 重 四 郎

前漢城府民會長

俞 吉 濬

本會評議員

舊韓國宮內府書記官

井 上 雅 二

舊韓國宮內府奎章閣囑托

千 葉 昌 胤

東洋專門學校京城分校幹事文學士

河 合 弘 民

前京城日報社長

大 岡 力

學部書記官文學士

小 田 省 吾

舊韓國宮內府奎章閣圖書課長

黑 崎 美 智 雄

總督府文書課長

前 間 恭 作

總督府人事局長 國分象太郎
 高等法院判事法學士 淺見倫太郎
 鮎貝房之進
 菊地謙讓
 三宅長策
 嶺八郎
 京城控訴院部長法學士
 東洋拓殖會社秘書長法學士

本會主幹 朝鮮雜誌社長 釋尾春菴
 句讀者

杉山孝敏
 朴齊翊

朝鮮古書刊行會

明治四十四年七月二十日印刷
 明治四十四年七月廿三日發行

會員豫約費一册參圓五十錢
 會員外一册賣價五圓

朝鮮京城旭町一丁目百六十四番地

朝鮮古書刊行會代表者
 編輯兼發行者

釋尾春菴

京城明治町三丁目日韓印刷株式會社内

印刷者 山口竹二郎

朝鮮京城旭町壹丁目朝鮮雜誌社

發行所 朝鮮古書刊行會

電話一千二百五十五番
 振替口座京城一三一番

京城明治町三丁目

印刷所 日韓印刷株式會社

朝鮮京城本町二丁目

豫約並發賣取次店 日韓書房

東京神田表神保町

豫約並發賣取次店 同文館

四十四卷
十一月廿二日
會身
十一月廿二日
會身
十一月廿二日
會身

釋
風
香
商

寶
計
潤
時
猶
古
書
氏
行
會

潤
時
猶
古
書
氏
行
會



